

Delegat Staša Košarac postavio je pitanje Tužilaštvu BiH i Sudu BiH. Pitanje glasi:

„Koliko su, od osnivanja do danas, Tužilaštvo BiH i Sud BiH izuzeli predmeta iz entitetskih tužilaštava, odnosno sudova, a sve u skladu s članom 7. stav (2) Zakona o Sudu BiH, kao i na koji način su ti predmeti izuzeti? Molim da se to iskaže brojačano, te da se razdvoje podaci koji se odnose na tačku a) i tačku b) ovog stava.

Na koji način je Tužilaštvo BiH došlo do saznanja da su počinjena krivična djela koja bi bila primjenjiva u skladu s članom 7. stav (2) Zakona o Sudu BiH, odnosno da li su predmete ustupala entitetska tužilaštva ili je Tužilaštvo BiH samoinicijativno pokretalo ovakve postupke i tražilo izuzimanje predmeta iz nadležnosti entitetskih tužilaštava? Ako je na drugi dio ovog pitanja potvrđan odgovor, na koji način je Tužilaštvo BiH dobilo informaciju o postojanju takvog predmeta u entitetskom tužilaštvu?“

Delegatkinja Nermina Kapetanović uputila je inicijativu Vijeću ministara BiH i Ministarstvu vanjske trgovine i ekonomskih odnosa BiH i dva pitanja Kolegiju Sekretarijata Parlamentarne skupštine BiH.

Inicijativa upućena Vijeću ministara BiH i Ministarstvu vanjske trgovine i ekonomskih odnosa BiH glasi:

„Inicijativa da se na nivou BiH obavežu domaći proizvođači mlijeka da na ambalaži brojačano naznače koliko je puta mlijeko reciklirano, radi zaštite građana, posebno djece.“

Pitanja upućena Kolegiju Sekretarijata Parlamentarne skupštine BiH glase:

1. Zašto se traže sredstva rezerve već nakon tri mjeseca od usvajanja Zakona o budžetu institucija BiH za 2013. godinu?
2. Zašto nije ispoštovana zakonska procedura? Odnosno, prethodno je trebalo pribaviti pozitivno mišljenje Ministarstva finansija i trezora BiH i Ureda za zakonodavstvo BiH. S predmetnim zahtjevom nije upoznata Zajednička komisija za administrativne poslove koja je nadležna za budžet Parlamentarne skupštine BiH i koja bi trebala dati saglasnost za upućivanje zahtjeva po zakonom propisanoj proceduri?
3. Zašto su primljeni novozaposleni ako nisu odobrena sredstva u budžetu predviđena za tu namjenu?

4. Zašto se sredstva iz budžetske rezerve, između ostalog, traže za nabavku tri vozila, uz plansku cijenu od 105.000,00 KM po vozilu?

Drugo pitanje Kolegiju Sekretarijata Parlamentarne skupštine BiH glasi:

„Molim da mi Kolegij Sekretarijata Parlamentarne skupštine BiH dostavi kompletan spisak zaposlenika i državnih službenika u Sekretarijatu Parlamentarne skupštine BiH, a koji će sadržavati: ime i prezime, naziv radnog mjesta, završenu stručnu spremu, poziciju radnog mjesta i potrebne uslove za to radno mjesto, kao i naziv završene stečene stručne spreme svakog zaposlenika i državnog službenika.”